

PENERBITAN ARTIKEL OLEH JABATAN KHIDMAT KORPORAT 2024

TERBITAN : DEWAN EKONOMI | INFO CUKAI

KELUARAN : JANUARI 2024

TAJUK : APA ITU PROGRAM KHAS PENGAKUAN SUKARELA 2.0?

Info Cukai

Oleh: HASIL



Apakah yang dimaksudkan dengan Program Khas Pengakuan Sukarela 2.0 yang sedang dilaksanakan oleh HASIL?

Program Khas Pengakuan Sukarela (PKPS) merupakan satu daripada usaha kerajaan untuk menggalakkan pembayar cukai tampil secara sukarela dan melaporkan pendapatan yang sepatutnya sepanjang program ini dijalankan. Hal ini pertama kali dilaksanakan bagi tempoh mulai 3 November 2018 dan berakhir pada 30 September 2019.

Atas kejayaan program yang dilihat memberi ruang kepada pembayar cukai untuk menunaikan tanggungjawab mereka di samping melahirkan lebih ramai rakyat Malaysia yang celik cukai, Lembaga Hasil Dalam Negeri Malaysia (HASIL) sekali lagi melaksanakan program ini mulai 6 Jun 2023 hingga 31 Mei 2024. Inisiatif ini adalah untuk menyokong rukun pemampahan dalam pentadbiran percukaian negara seiring dengan konsep Malaysia MADANI. PKPS 2.0 yang ditawarkan ini memberi peluang kepada pembayar cukai untuk meningkatkan tahap pematuhan cukai mereka berteraskan konsep kesedaran, pendidikan dan perkhidmatan (AES) yang diamaikan di HASIL.

Dalam pada itu, PKPS 2.0 turut memfokuskan kepada penyertaan pembayar cukai baharu dalam melaporkan

pendapatan kepada HASIL selaras dengan pelaksanaan Nombor Pengenalan Cukai (TIN) mulai tahun 2023 seperti yang dibentangkan dalam Belanjawan 2022, iaitu sebanyak 7.8 juta individu warganegara dan pemastautin tetap diberikan TIN secara automatik. TIN melibatkan individu warganegara yang berumur 18 tahun dan ke atas. Individu yang perlu melaporkan pendapatan kepada HASIL adalah seperti mana yang dinyatakan di bawah peruntukan Seksyen 77 Akta Cukai Pendapatan (ACP) 1967.

Pengakuan sukarela ini meliputi skop pelaporan pendapatan, perbelanjaan atau tuntutan, pelepasan dan potongan yang perlu dikemukakan kepada HASIL semasa tempoh penghantaran borang cukai pendapatan mengikut kategori percukaian yang berkaitan. Hal ini juga merangkumi konteks selain cukai pendapatan, iaitu pelaporan bagi pelupusan aset dan proses setem dokumen atau perjanjian. PKPS 2.0 menawarkan kadar penalti sebanyak kosong peratus (0%) bagi setiap pelaporan yang diterima dalam tempoh pelaksanaan program.

Bagaimanakah PKPS 2.0 ini boleh memanfaatkan pemilik perniagaan?



Apabila sesebuah perniagaan didaftarkan, seorang pemilik perniagaan yang baik akan sentiasa berusaha untuk memastikan kelancaran operasi di samping menjalankan perniagaan berteraskan undang-undang. Hal ini termasuklah mematuhi semua syarat dan ketetapan yang dibuat oleh agensi berkaitan seperti Suruhanjaya Syarikat Malaysia (SSM), Jabatan Kastam Diraja Malaysia, Pihak Berkuasa Tempatan (PBT) negeri dan sebagainya.

Dalam konteks percukaian, pemilik perniagaan mempunyai tanggungjawab yang perlu dipenuhi bukan sahaja melibatkan diri sendiri, malah ke atas perniagaan yang diusahakan. Tanggungjawab yang dimaksudkan termasuklah:

- Mendaftar nombor cukai pendapatan atau mengemas kini maklumat diri dan perniagaan.
- Mengemukakan Borang Nyata Cukai Pendapatan (BNCP) kepada HASiL sama ada menggunakan borang kertas atau melalui aplikasi e-Filing.
- Melaporkan pendapatan dan perbelanjaan termasuk potongan dan rebat.
- Mengira dan membayar jumlah cukai pendapatan yang dikenakan.
- Menyimpan rekod, dokumen dan helaian kerja selama tujuh (7) tahun bagi tujuan pengauditan.

Selain daripada fail cukai pendapatan individu (kategori fail IG), pemilik perniagaan turut berpotensi mempunyai fail cukai majikan (kategori fail E), perkongsian (kategori fail D) dan syarikat (kategori fail C). Secara asasnya, pemilik perniagaan perlu mengetahui dan memahami bahawa setiap daripada mereka mempunyai peranan yang penting terhadap pembangunan negara melalui sumbangan cukai yang disalurkan.

Pelaksanaan PKPS 2.0 sememangnya akan membawa manfaat kepada pemilik perniagaan. Manfaat berupa pengenaan kadar penalti sebanyak 0% ini ditawarkan kepada:

- Pembayar cukai baharu yang belum pernah melaporkan pendapatan kepada HASiL tetapi telah memulakan perniagaan atau mempunyai pendapatan bagi Tahun Taksiran 2022 dan ke belakang.
- Pembayar cukai yang pernah melaporkan pendapatan kepada HASiL dan mempunyai pendapatan yang tidak pernah dilaporkan atau kurang dilaporkan, perbelanjaan atau tuntutan lain yang terlebih tuntut atau tidak dibenarkan, pelepasan atau potongan atau rebat terlebih tuntut dan elaun modal atau insentif yang terlebih tuntut; melibatkan Tahun Taksiran 2021 dan ke belakang.
- Pembayar cukai yang tidak melaporkan pelupusan aset bagi Tahun Taksiran 2022 dan ke belakang.
- Pembayar duti yang mengemukakan dokumen atau perjanjian yang telah disempurnakan (ditandatangani) pada atau sebelum 01 Mei 2023 untuk proses setem mulai 6 Jun 2023 hingga 31 Mei 2024.

Sepanjang pelaksanaan PKPS 2.0, semua maklumat pengakuan sukarela yang dibuat dalam tempoh ini akan diterima dengan suci hati. Tindakan audit atau siasatan tidak akan dilakukan pada masa akan datang bagi tahun taksiran di mana pengakuan sukarela dibuat. Oleh itu, pemilik perniagaan amat disarankan untuk mengambil peluang untuk menyertai PKPS 2.0 ini bagi mengelakkan daripada tindakan penguatkuasaan audit, iaitu pengenaan penalti adalah berdasarkan Rangka Kerja Audit Cukai yang sedang berkuat kuasa.

Maklumat lanjut berhubung PKPS 2.0 dan aspek percukaian langsung yang lain boleh didapati daripada Portal Rasmi HASiL di www.hasil.gov.my.

